

Komunike Upravnog odbora Vijeća za implementaciju mira

Politički direktori Upravnog odbora Vijeća za implementaciju mira su se 20. oktobra 1999. godine u Sarajevu susreli sa Visokim predstavnikom i Šefom misije OSCE-a.

Upravni odbor je pozdravio i podržao Nacrt izbornog zakona za Bosnu i Hercegovinu koji je izrađen pod pokroviteljstvom domaćih stručnjaka, OHR-a i OSCE-a. Upravni odbor je sa zadovoljstvom primio k znanju činjenicu da Nacrt zakona sadrži mnoge nove elemente koji će promovirati veću odgovornost političara, uključujući otvorene kandidatske liste na svim nivoima, izborne jedinice iz kojih će se birati više kandidata, značajniju ulogu žena u bh. politici, ograničavanje sredstava koja se troše na izbornu kampanju, i preferencijalni sistem glasanja za Predsjedništvo BiH. Zakonom se priznaju ustavna i zakonska prava svih građana BiH u oba entiteta, iz svih konstitutivnih naroda, uključujući "Ostale".

Upravni odbor je pozdravio mogućnost da raseljene osobe i izbjeglice i dalje glasaju za svoje prijeratne općine.

Upravni odbor je pozdravio različite odredbe u Nacrtu zakona kojima se od svih političkih stranaka i kandidata zahtijeva potpuna saradnja sa Haškim tribunalom.

Upravni odbor je takođe istakao da Parlamentarna skupština Bosne i Hercegovine sada snosi odgovornost za poduzimanje hitnih mjera u cilju usvajanja ovog Nacrta zakona, kao i važnost usvajanja ovog Zakona za prijem Bosne i Hercegovine u Vijeće Evrope. Visoki predstavnik, Šef misije OSCE-a i Upravni odbor naglasili su da Nacrt zakona u velikoj mjeri predstavlja rezultat zajedničkog rada građana BiH – putem učešća lokalnih stručnjaka u njegovoj izradi – i međunarodne zajednice.

Upravni odbor, Visoki predstavnik i Šef misije OSCE-a su se složili da Izborni zakon predstavlja veliki korak naprijed u procesu uspostave jedinstvenog izvora legitimnosti u kompleksnom sistemu – slobodnih izbora na kojima stanovništvo svojim pristankom bira organe vlasti.

Upravni odbor je Radnoj grupi za izborni zakon čestitao na uspješnom okončanju dugog i komplikovanog zadatka.